

Thaum twg ais peb pom koj muaj mob lossis pom koj raug kaw hauv tsev lojcuaj, peb tau tuaj xyuas koj no?

Vajntxwv yuav teb hais tias, kuv qhia tseeb rau nej hais tias, thaum nej pab kuv cov kwvtij no ib tug, txawm yog tus ntawd tsis muaj hwjchim dabtsi li los yog, nej tseem pab nws thiab, qhov uas nej pab li ntawd twb yog nej pab kuv ntag.

Thiab nws yuav hais rau cov uas nyob ntawm nws sab laug hais tias, nej yog cov uas raug Vajtswv foom tsis zoo. Nej cia li khiav tawm ntawm kuv mus lawm hauv lub cubtawg uas cig tsis txawj tuag mus ib txhis li. Qhov chaw ntawd yog qhov uas Vajtswv twb tu tseg cia rau dab Ntxwngnyoog thiab dab Ntxwngnyoog cov tubtxib mus nyob lawm.

Thaum kuv tshaib plab nej tsis muab mov rau kuv noj. Thaum kuv nqhis dej nej tsis muab dej rau kuv haus.

Thaum kuv tuaj ua qhua, nej twb tsis hu kuv los so hauv nej tsev. Thaum kuv tsis muaj tsoostsho hnav nej twb tsis muab rau kuv hnav. Thaum kuv muaj mob muaj nkeeg thiab raug kaw hauv tsev lojcuaj nej twb tsis tuaj tu kuv.

Lawv yuav teb nws hais tias, tus Tswv thaum twg ais peb pom koj tshaib plab, koj nqhis dej, koj tuaj ua qhua, koj tsis muaj tsoostsho hnav, lossis pom koj raug kaw hauv tsev lojcuaj ais peb tsis pab koj?

Vajntxwv yuav teb lawv hais tias, kuv qhia tseeb rau nej hais tias, qhov uas nej tsis pab cov neeg ntawm no tus uas tsis muaj hwjchim dabtsi li, qhov ntawd twb yog nej tsis pab kuv ntag.

Cov neeg ntawd yuav raug txim mus ib txhis li, tiamsis cov neeg ncaincees yuav tau txojtia ntev mus ib txhis. (Mathais 25:31-46)

371

TUS UAS TAU KOOBHMOOV

Yexus pom muaj neeg coob coob li ntawd, Yexus mus pem roob. Nws zaum ped. Nws cov thwjtim los cuag nws.

Nws pib qhia lawv hais tias, Tus uas paub hais tias, nws ua tsis tau nws lub neej raws li Vajtswv lub siab nyiam, tus ntawd tau koobhmoov, rau qhov Vajtswv twb los kav nws lub siab lawm.

Tus uas nyob nluasnlob, tus ntawd tau koobhmoov, Vajtswv yuav ntuas nws.

Tus uas txo hwjchim, tus ntawd tau koobhmoov, nws yuav tau tej uas Vajtswv cog lus tseg hais tias, Vajtswv yuav muab rau nws.

Tus uas xav ua raws li Vajtswv lub siab nyiam heev dua lwm yam huv tibi, tus ntawd tau koobhmoov, Vajtswv yuav muab rau tus ntawd kom txaus nkaus li nws lub siab xav yuav.